

VENDIM
Nr. 47, datë 28.3.2014

PËR PLANIN E DHËNIES SË NDIHMËS SHTETËRORE “PËR PROGRAMIN E NXITJES SË PUNËSIMIT TË PERSONAVE ME AFTËSI TË KUFIZUAR”

Komisioni i Ndhmës Shtetërore, me pjesëmarrjen e:

- Z. Arben Ahmetaj kryetar
- Znj. Mimoza Dhëmbi anëtare
- Z. Edmond Ademi anëtar
- Z. Ahmet Maçellari anëtar
- Znj. Anduena Dedja anëtare,

në mbledhjen e tij të datës 28.3.2014, shqyrtoi raportin për planin e dhënies së ndihmës shtetërore “Për programin e nxitjes së punësimit të personave me aftësi të kufizuar”. Raportimi është bërë pranë Drejtorisë së Tregut të Brendshëm në Ministrinë e Zhvillimit Ekonomik, Tregtisë dhe Sipërmarrjes nga Ministria e Mirëqenies Sociale dhe Rinisë, me shkresën nr. 1355, datë 10.3.2014 dhe është regjistruar në regjistrin me nr. Al/N/15/2014.

OBJEKTIVI/AT: Plani për dhënien e ndihmës ka si objektiv nxitjen e punësimit, duke i ofruar lehtësi ndërmarrjeve, të cilat punësojnë persona me aftësi të kufizuar nëpërmjet kontratave vjetore të punës. Masa ka si qëllim lehtësimin e integritetit të kësaj kategorie në tregun e punës, jetën shoqërore dhe ekonomike të vendit.

BAZA LIGJORE: Projektvendimi i Këshillit të Ministrave “Për programin e nxitjes së punësimit të personave me aftësi të kufizuar” i iniciuar nga Ministria e Mirëqenies Sociale dhe Rinisë.

Komisioni i Ndhmës Shtetërore, pasi shqyrtoi raportin e përgatitur nga Drejtoria e Tregut të Brendshëm dhe gjithë dokumentacionin mbështetës,

VËREN SE:

1. Mbështetja financiare do t’u jepet ndërmarrjeve, të cilat punësojnë persona me aftësi të kufizuar nëpërmjet kontratave vjetore të punës.

2. Masa ka një afat të përcaktuar kohor prej 5 vitesh. Llogaritja e kohëzgjatjes fillon nga momenti kur skema do të nisë zbatimin në vitin e parë të saj.

3. Dhënësi i ndihmës është Ministria e Mirëqenies Sociale dhe Rinisë. Autoriteti përgjegjës për zbatimin e kësaj mase është Shërbimi Kombëtar i Punësimit.

4. Përfitues të ndihmës janë ndërmarrjet e vogla dhe të mesme, që punësojnë personat me aftësi të kufizuar, si edhe ndërmarrjet, të cilat kanë mundësi të punësojnë këta persona kundrejt përshtatjes së vendit të punës.

5. Skema zbatohet në të gjithë sektorët e ekonomisë, për punëdhënësit, të cilët nuk duhet të kenë shkelur në të kaluarën legjislacionin e punës, si edhe duhet të kenë derdhur rregullisht tatimet, sigurimet shoqërore dhe shëndetësore.

6. Mbështetja do të përballohet nga fondet e buxhetit të shtetit për nxitjen e punësimit, që alokohen çdo vit për Ministrinë e Mirëqenies Sociale dhe Rinisë.

7. Ndihma do t’u jepet ndërmarrjeve që paraqesin projektet për punësim dhe do të jenë objekt i shqyrtimit dhe i vlerësimit nga pikëpamja e dobisë social-ekonomike. Projektet fituese do të përfitojnë format e mbështetjes nga fondet e nxitjes së punësimit, si:

- Një financim mujor në masën deri në 100 për qind të sigurimeve të detyrueshme shoqërore dhe shëndetësore, të pjesës së kontributit të punëdhënësit, me kusht që kohëzgjatja e kontratës së punës të mos jetë më e shkurtër se një vit;

- Financim për të pajisur siç duhet vendin e punës/transport personit me aftësi të kufizuar dhe për t’i siguruar atij/asaj një përgatitje thelbësore për punën deri në masën 100.000 lekë, por jo më shumë se 200 000 lekë, nëse punëson më shumë se dy persona;

- Financim të shpenzimeve të trajnimit të ofruar nga ndërmarrja deri në 70% të tarifave.

8. Në kuptim të nenit 4 të ligjit për ndihmën shtetërore, masa përbën ndihmë shtetërore, nëse përmbushen në mënyrë kumulative kushtet: a) aktivizohen burime shtetërore; b) jepet një avantazh ekonomik; dhe c) sjell pasoja mbi konkurrencën.

a) Prezenca e burimeve shtetërore

Masa mbulon koston e pagës për sigurimet e detyrueshme shoqërore dhe shëndetësore, të pjesës së

kontributit të punëdhënësit, financimin për të pajisur siç duhet vendin e punës, si edhe financimin e shpenzimeve të trajnimit të ofruar nga ndërmarrja. Të tria format aktivizojnë burime shtetërore nga fondet e buxhetit të shtetit.

b) Avantazhi ekonomik dhe selektiviteti

Masa ofron mbështetje financiare për ndërmarrjet, që lidhin kontrata afatshkurtra të punës. Ulja e kostos së punës për këto ndërmarrje përmirëson pozitën ekonomike të tyre. Ndihma jepet vetëm për punëdhënësit, projektet e të cilëve përzgjidhen fitues nga komisioni i miratimit të projekteve.

c) Pasoja në konkurrencë

Kohëzgjatja e masës është e shkurtër dhe efekti në konkurrencën në treg është i vogël.

9. Mbështetur në ligjin nr. 9374, datë 21.4.2005 “Për ndihmën shtetërore”, të ndryshuar, neni 10 “Ndihma për punonjësit në vështirësi dhe për punonjësit me aftësi të kufizuar”, intensiteti i skemës së ndihmës nuk e kalon kufirin e lejuar.

PËR KËTO ARSYE,

Komisioni i Ndihmës Shtetërore, në bazë të nenit 10 dhe 17, shkronja “a” të ligjit nr. 9374, datë 21.4.2005 “Për ndihmën shtetërore”, të ndryshuar,

VENDOSI:

1. Të miratojë planin e dhënies së ndihmës shtetërore nëpërmjet programit të nxitjes së punësimit të personave me aftësi të kufizuar, si një skemë ndihme të lejueshme.

2. Të gjitha planet, të cilat ndryshojnë masën e ndihmës, duhet të njoftohen dhe marrin miratimin paraprak të KNSH-së.

3. Ministria e Mirëqenies Sociale dhe Rinisë, brenda datës 31 mars, të japë çdo informacion që do të kërkohet për monitorimin dhe kontrollin e ndihmës së dhënë.

4. Ky vendim hyn në fuqi menjëherë.

KRYETARI
Arben Ahmetaj